

Dennis Gratz  
Zastupnik u Predstavničkom domu Parlamenta Federacije Bosne i Hercegovine  
Broj: 148/18  
Sarajevo, 29.03.2018.

**Dostaviti:**  
Bosna i Hercegovina  
Federacija Bosna i Hercegovina  
Parlament Federacije BiH

PREDSTAVNIČKI DOM  
n/r Edin Mušić, predsjedavajući

**PREDMET: PRIJEDLOG ZAKONA O IZBORU, PRESTANKU MANDATA, OGRANIČENJU KANDIDATURE, OPOZIVU I ZAMJENI GRADONAČELNIKA GRADOVA I NAČELNIKA OPĆINA U FEDERACIJI BOSNE I HERCEGOVINE**

Poštovani,

Na osnovu člana 179, a u vezi sa članom 163. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, broj 69/07 i 2/08), upućujem poslaničku inicijativu za donošenje **Prijedloga zakona o izboru, prestanku mandata, ograničenju kandidature, opozivu i zamjeni gradonačelnika gradova i načelnika općina u Federaciji Bosne i Hercegovine.**

Prijedlog sa obrazloženjem na bosanskom jeziku i elektronsku verziju istog, možete naći u prilogu. Tražim da se isti dostavi Vladi Federacije BiH na razmatranje.

S poštovanjem,



dr. Dennis Gratz  
Zastupnik u Predstavničkom domu Parlamenta Federacije BiH  
Naša stranka

Bosna i Hercegovina  
FEDERACIJA BOSNE I HERCEGOVINE  
PARLAMENT FEDERACIJE BOSNE I HERCEGOVINE  
PREDSTAVNIČKI - ZASTUPNIČKI DOM  
SARAJEVO

PRIMLJENO: 29-03-2018				
Org. jed.	Klasif. grupa	Broj i godina	Vrijednost	Priloga
01	-	02 -	557	18

Bosna i Hercegovina  
FEDERACIJA BOSNE I HERCEGOVINE  
PARLAMENT FEDERACIJE BOSNE I HERCEGOVINE  
DOM NARODA  
SARAJEVO

Primljeno: 29-03-2018			
Org. jed.	Broj	Priloga	Vrijednost
02 -	02 -	557	18

**DENNIS GRATZ**  
**ZASTUPNIK U PREDSTAVNIČKOM DOMU**  
**PARLAMENT FEDERACIJE BOSNE I HERCEGOVINE**

**PRIJEDLOG**

**ZAKON O IZBORU, PRESTANKU  
MANDATA, OGRANIČENJU  
KANDIDATURE, OPOZIVU I ZAMJENI  
GRADONAČELNIKA GRADOVA I  
NAČELNIKA OPĆINA U FEDERACIJI  
BOSNE I HERCEGOVINE**

**Sarajevo, mart 2018.**

**Zakon o izboru, prestanku mandata, ograničenju kandidature, opozivu i zamjeni gradonačelnika gradova i načelnika općina u Federaciji Bosne i Hercegovine**

**Član 1.**  
**(Predmet Zakona)**

Zakonom o izboru, prestanku mandata, ograničenju kandidature, opozivu i zamjeni gradonačelnika gradova i načelnika općina u Federaciji BiH (u daljem tekstu: Zakon) uređuje se izbor, prestanak mandata, ograničenje kandidature, opoziv i zamjena gradonačelnika gradova i načelnika općina u Federaciji Bosne i Hercegovine (u daljem tekstu: gradonačelnik/načelnik).

**Član 2.**  
**(Izbor na direktnim izborima)**

Gradonačelnik/načelnik će biti izabran neposredno na tajnim, redovnim i demokratskim izborima u skladu sa odredbama Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16) (u daljnjem tekstu: Izborni zakon), osim ako Ustav Bosne i Hercegovine ili Ustav Federacije Bosne i Hercegovine nisu drugačije odredili.

**Član 3.**  
**(Kandidiranje)**

Svaki kandidat za gradonačelnika/načelnika kandiduje se u skladu sa odredbama Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16) (u daljnjem tekstu: Izborni zakon).

Kandidati za gradonačelnika/načelnika nalaze se na istoj listi kandidata.

Redosljed kandidata za gradonačelnika/načelnika vrši se na način kako je to propisano odredbama Izbornog zakona.

**Član 4.**  
**(Ograničenje kandidature)**

Za funkciju gradonačelnika/načelnika se ne može kandidovati osoba koja je u istom gradu/općini nosila ovu funkciju dva mandata uzastopno.

**Član 5.**  
**(Glasački listić)**

Glasački listić za gradonačelnika/načelnika omogućava glasaču da svoj glas dodijeli samo jednom kandidatu.

Glasački listić sadrži:

- datum izbora;
- naziv organa za koji se vrši izbor;
- imena svih kandidata iza kojih je označen naziv stranke, odnosno koalicije, ili oznaka nezavisni kandidat.

Glasački listić smatrat će se važećim ili nevažećim u slučajevima kako je to propisano odredbama Izbornog zakona.

**Član 6.**  
**(Izbor gradonačelnika/načelnika)**

Gradonačelnik/načelnik biraju građani na neposrednim i tajnim izborima na području općine/grada upisani u Centralni birački spisak u toj općini/gradu ili na području općina koje sačinjavaju grad.

Gradonačelnik/načelnik bez obzira da li na izborima sudjeluje jedan ili više kandidata, bira se većinom svih birača koji su glasali. Ako nijedan kandidat ne dobije takvu većinu, izbor se ponavlja nakon 30 dana.

Ako je na izborima sudjelovalo više kandidata, pravo da budu birani imaju dva kandidata koja su u prvom glasanju dobili najviše glasova. Ukoliko neki od kandidata odustane, pravo da bude ponovno biran stječe kandidat koji je naredni po broju dobivenih glasova.

U slučaju da zbog odustajanja kandidata koji prema odredbama stava (3) imaju pravo učestvovati u ponovljenom izboru ostane samo jedan kandidat obaviti će se izbor.

Na ponovljenom izboru izabran je kandidat koji dobije najveći broj glasova birača koji su glasali. Ako kandidati dobiju isti broj glasova, izbor se još jednom ponavlja.

Mandat gradonačelnika/načelnika traje četiri godine i vezan je za mandat saziva gradskog/općinskog vijeća.

Mandat načelnika izabranog na prijevremenim izborima teče do redovnog isteka mandata gradskog/općinskog vijeća.

**Član 7.**  
**(Prestanak mandata gradonačelnika/načelnika)**

Izabranom gradonačelniku/načelniku prestaje mandat prije isteka vremena na koje je izabran u skladu sa odredbom člana 1.10. Izbornog zakona.

**Član 8.**  
**(Opoziv gradonačelnika/načelnika)**

Inicijativa s obrazloženjem za pokretanje postupka opoziva načelnika može biti pokrenuta od gradskog/općinskog vijeća putem 1/3 vijećnika gradskog/općinskog vijeća, ili 10% registrovanih birača na području grada/općine.

Gradsko/Općinsko vijeće dužno je sve inicijative za pokretanje opoziva gradonačelnika/načelnika iz stava 1. ovog člana staviti na dnevni red naredne sjednice gradskog/općinskog vijeća.

Odluka o pokretanju opoziva gradonačelnika/načelnika donosi se većinom glasova od ukupnog broja vijećnika u gradskom/općinskom vijeću. U slučaju prihvatanja inicijative gradsko/općinsko vijeće dužno je donijeti odluku o pokretanju postupka opoziva načelnika u roku od 30 dana.

Ako gradsko/općinsko vijeće donese odluku o prihvatanju inicijative opoziva načelnika, provodi se postupak u kojem građani odlučuju direktnim tajnim glasanjem.

Mandat gradonačelnika/načelnika prestaje ukoliko natpolovična većina građana koji su glasali donese odluku o opozivu gradonačelnika/načelnika.

Odluka građana je obvezujuća za gradsko/općinsko vijeće i gradonačelnika/načelnika.

**Član 9.**  
**(Zamjena gradonačelnika/načelnika)**

Gradonačelnika/načelnika za vrijeme privremene odsutnosti ili spriječenosti zamjenjuje dužnosnik ili djelatnik gradskih/općinskih organa uprave, kojeg on ovlasti.

Dužnost gradonačelnika/načelnika u slučaju prestanka mandata u smislu člana 5. ovog Zakona i u slučaju opoziva u smislu člana 6. ovog Zakona, do ponovnog izbora načelnika, vrši osoba izabrana od gradskog/općinskog vijeća natpolovičnom većinom od ukupnog broja članova gradskog/općinskog vijeća.

#### **Član 10.**

##### **(Prijevremeni izbori)**

Nakon prestanka mandata gradonačelnika/načelnika u smislu člana 5. ovog Zakona i opoziva načelnika u smislu člana 6. ovog Zakona, prijevremeni izbori za izbor gradonačelnika/načelnika moraju se održati u roku od 60 dana od dana prestanka mandata ili opoziva.

#### **Član 11.**

##### **(Primjena Izbornog zakona)**

Opće biračko pravo (aktivno i pasivno) za izbor gradonačelnika/načelnika, tijela za provedbu izbora, ovjera i kandidovanje za izbor, provedba izbora, zaštita izbornog prava, verifikovanje izbornih rezultata i ponovni, odgođeni i prijevremeni izbori regulirani su Izbornim zakonom i direktno se primjenjuju na izbor gradonačelnika/načelnika.

#### **Član 12.**

##### **(Obaveza usklađivanja statuta)**

Gradska/općinska vijeća dužna su uskladiti statute gradova/općina sa odredbama ovog Zakona u roku od 60 dana od dana stupanja na snagu ovog Zakona, a najkasnije do dana primjene ovog Zakona.

Ukoliko gradska/općinska vijeća ne ispune obavezu iz prethodnog stava direktno će se primjenjivati ovaj Zakon.

#### **Član 13.**

##### **(Izuzetak od primjene postupka opoziva)**

Postupak opoziva gradonačelnika/načelnika ne može se voditi 100 dana nakon izbora načelnika, niti u izbornoj godini predviđenoj za lokalne izbore.

#### **Član 14.**

##### **(Stupanje na snagu)**

Ovaj zakon stupa na snagu osmog dana od dana objavljivanja u „Službenim novinama Federacije Bosne i Hercegovine“.

Danom stupanja na snagu ovog Zakona prestaje važiti Zakon o izboru, prestanku mandata, opozivu i zamjeni načelnika općina u Federaciji Bosne i Hercegovine ("Službene novine Federacije BiH", br. 19/08).

PREDSJEDAVAJUĆA DOMA NARODA  
PARLAMENTA FEDERACIJE BIH

PREDSJEDAVAJUĆI PREDSTAVNIČKOG DOMA  
PARLAMENTA FEDERACIJE BIH

# **OBRAZLOŽENJE PRIJEDLOGA ZAKONA O IZBORU, PRESTANKU MANDATA, OGRANIČENJU KANDIDATURE, OPOZIVU I ZAMJENI GRADONAČELNIKA GRADOVA I NAČELNIKA OPĆINA U FEDERACIJI BOSNE I HERCEGOVINE**

## **I – USTAVNI OSNOV**

Ustavni osnov za donošenje ovog Zakona je sadržan u Poglavlju IV A. 5. 20. (1) k) kojim je propisano da je Parlament Federacije Bosne i Hercegovine nadležan za vršenje drugih nadležnosti koje su mu povjerene.

## **II – RAZLOZI ZA DONOŠENJE OVOG ZAKONA**

Razlozi za donošenje ovog zakona jeste očigledna neusklađenost zakona koji uređuju status pojedinih gradova u Federaciji, ali i drugih propisa na entitetskom, kantonalnom i lokalnom nivou koji se tiču mandata gradonačelnika gradova i načelnika općina. Izmjene predviđaju jasno uređenje statusa i izbora gradonačelnika i načelnika, te izmjenu potrebnih uslova za izbor kroz mogućnost dvokružnog izbora.

## **III – FINANSIJSKA SREDSTVA**

Za Prijedlog nisu potrebna dodatna finansijska sredstva.

S poštovanjem,



Dennis Gratz

Zastupnik u Predstavničkom domu Parlamenta Federacije Bosne i Hercegovine

## **DOSTAVLJENO:**

- Naslovu
- Predsjedniku FBiH
- Vladi Federacije BiH
- Parlamentu FBiH – Predstavnički dom i Dom naroda Parlamenta FBiH
- Evidencija